

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
V L A D A**

N A C R T

**ZAKON
O ZNAČAJNIM DATUMIMA, DOGAĐAJIMA I LIČNOSTIMA
NA PODRUČJU TUZLANSKOG KANTONA**

Tuzla, mart, 2016. godine

Na osnovu člana 24. stav 1. tačka c) Ustava Tuzlanskog kantona (“Službene novine Tuzlansko-podrinjskog kantona”, br. 7/97 i 3/99 i “Službene novine Tuzlanskog kantona”, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj _____2016. godine, donosi

ZAKON O ZNAČAJNIM DATUMIMA, DOGAĐAJIMA I LIČNOSTIMA NA PODRUČJU TUZLANSKOG KANTONA

I OSNOVNE ODREDBE

Član 1. (Predmet Zakona)

Ovim zakonom utvrđuju se značajni datumi, događaji i ličnosti na području Tuzlanskog kantona (u daljem tekstu: Kanton), nosioci obilježavanja i nosioci aktivnosti obilježavanja značajnih datuma, događaja i ličnosti, planiranje i realizacija aktivnosti i način finansiranja.

Član 2. (Cilj Zakona)

Cilj ovog zakona je da se sačuva uspomena na datume, događaje i ličnosti koji su značajni za Kanton.

II DEFINICIJE

Član 3. (Definicije)

Pojedini izrazi koji se koriste u ovom zakonu imaju sljedeća značenja:

- a) **Značajni datum** je datum koji označava bitna dešavanja na području Kantona koje je potrebno obilježavati;
- b) **Značajan događaj** je događaj koji je od značaja za područje Kantona i koji je kao takav potrebno obilježavati;
- c) **Značajna ličnost** je ličnost koja je svojim djelima dala izuzetan doprinos Kantonu;
- d) **Nosilac obilježavanja** je kantonalni organ nadležan za obilježavanje značajnog datuma, događaja i ličnosti;
- e) **Nosilac aktivnosti obilježavanja** je udruženje i druga institucija zadužena od strane nosioca obilježavanja za provođenje aktivnosti obilježavanja značajnog datuma, događaja i ličnosti.

III ZNAČAJNI DATUMI, DOGAĐAJI I LIČNOSTI I NOSIOCI OBILJEŽAVANJA

Član 4. (Značajni datumi, događaji i ličnosti)

- (1) Kao značajni datumi za područje Kantona utvrđuju se:
 - a) 11. januar, regionalno savjetovanje općinskih štabova Patriotske lige i komandira specijalnih jedinica,
 - b) 01. mart, Dan nezavisnosti Bosne i Hercegovine,
 - c) 15. april, Dan Armije Republike Bosne i Hercegovine,
 - d) 09. maj, Dan pobjede nad fašizmom,
 - e) 10. maj, Dan 115. Brigade HVO-a - Zrinski,

- f) 22. maj, Dan policije Tuzlanskog kantona i dan prijema Bosne i Hercegovine u Ujedinjene nacije,
 - g) 12. juni, Dan dobitnika najvećih ratnih priznanja i odlikovanja,
 - h) 22. avgust, Dan formiranja Tuzlanskog kantona,
 - i) 29. septembar, Dan formiranja II Korpusa Armije Republike Bosne i Hercegovine,
 - j) 25. novembar, Dan državnosti Bosne i Hercegovine.
- (2) Kao značajni događaji na području Kantona utvrđuju se:
- a) odbrana Sapne „Čekić i nakovanj“, 06. maj,
 - b) oslobođenje Vijenca, 11. maj,
 - c) bitka na Brčanskoj maliti, 15. maj,
 - d) stradanje Tuzlanske mladosti „KAPIJA“, 25. maj,
 - e) genocid nad Bošnjacima „sigurne zone“ UN-a Srebrenica, 11. juli,
 - f) odbrana Teočaka, 16. juli,
 - g) akcija Oklopnog voza, 22. oktobar.
- (3) Kao značajne ličnosti na području Kantona i datumi obilježavanja godišnjice njihove pogibije utvrđuju se:
- a) Mehudin Hodžić, heroj odbrambeno-oslobodilačkog rata - 10. maj,
 - b) Nesib Malkić, heroj odbrambeno-oslobodilačkog rata - 25. septembar,
 - c) Hajrudin Mešić, heroj odbrambeno-oslobodilačkog rata - 30. oktobar.

Član 5. **(Nosioci obilježavanja)**

(1) Za obilježavanje značajnih datuma, događaj i ličnosti na području Kantona, utvrđuju se nosioci obilježavanja za svaki datum, događaj i ličnost pojedinačno kako slijedi:

a) Skupština Tuzlanskog kantona i Vlada Tuzlanskog kantona (u daljem tekstu: Vlada Kantona) su nosioci obilježavanja značajnih datuma utvrđenih u člana 4. stavu (1) tačke b), f)-dan prijema Bosne i Hercegovine u Ujedinjene nacije, tačke h) i j), kao i značajnih događaja utvrđenih u stavu (2) tačke d) i e),

b) Ministarstvo za boračka pitanja Tuzlanskog kantona je nosilac obilježavanja značajnih datuma, događaja i ličnosti utvrđenih u članu 4., stavu (1) tačke a), c), d), e), g) i i), stavu (2) tačka a), b), c), f) i g) i stavu (3), u koordinaciji sa savezima pripadnika branilačke populacije od posebnog društvenog interesa za Kanton i

c) Ministarstvo unutrašnjih poslova Tuzlanskog kantona je nosilac obilježavanja značajnog datuma utvrđenog u člana 4. stav (1) tačka f) ovog zakona-dan policije Tuzlanskog kantona.

(2) Nosioci obilježavanja iz stava 1. tačka a) ovog člana mogu ovlastiti i druge organe i institucije da u njihovo ime provedu aktivnosti vezane za obilježavanje značajnih datuma, događaja i ličnosti.

(3) Nosioci obilježavanja značajnih datuma, događaja i ličnosti za svaku godinu odlučujuu skladu sa svojim nadležnostima o pitanjima vezanim za način obilježavanja, finansiranja i kontrole utrošenih sredstava te određuju nosioci aktivnosti obilježavanja.

Član 6. **(Planiranje i realizacija aktivnosti)**

(1) Nosioci obilježavanja navedeni u članu 5. ovog zakona su obavezni da prilikom izrade budžetskih zahtjeva za narednu godinu planiraju sredstva koja su im neophodna za aktivnosti obilježavanja značajnih datuma, događaja i ličnosti.

(2) Nosioci obilježavanja u skladu sa svojim nadležnostima donose akte kojim uređuju godišnje programe obilježavanja.

(3) Nosilac obilježavanja iz člana 5. stav (1) tačka b) ovog zakona donosi program obilježavanja u saradnji sa nosiocima aktivnosti obilježavanja iz člana 5. stav (1) tačka b) ovog zakona, uz saglasnost Vlade Kantona.

(4) Obavezuju se nosioci obilježavanja da planiraju i prate obilježavanje svih značajnih događaja, datuma i ličnosti utvrđenih ovim zakonom, te da u saradnji sa elektronskim i pisanim medijima obezbijede medijsko praćenje obilježavanja.

IV FINANSIRANJE

Član 7.

(Sredstva za finansiranje aktivnosti)

Sredstva neophodna za finansiranje aktivnosti obilježavanja značajnih datuma, događaja i ličnosti obezbjeđuju se iz:

- a) Budžeta Kantona i
- b) drugih izvora.

V PRELAZNE I ZAVRŠNE ODREDBE

Član 8.

(Drugi značajni datumi, događaji i ličnosti)

(1) Jedinice lokalne samouprave mogu svojom odlukom utvrditi i druge značajne datume, događaje i ličnosti koji su od značaja za jedinicu lokalne samouprave.

(2) Vlada Kantona može učestvovati u organizaciji i obilježavanju značajnih datuma, događaja i ličnosti od značaja za jedinicu lokalne samouprave.

Član 9.

(Prestanak važenje drugih propisa)

Danom početka primjene ovog zakona prestaje da važi Odluka o utvrđivanju značajnih datuma na području Tuzlanskog kantona („Službene novine Tuzlanskog kantona“, broj: 4/12, 2/13, 2/14 i 1/15).

Član 10.

(Stupanje na snagu)

Ovaj Zakon stupa na snagu osmog dana od dana objavljivanja u “Službenim novinama Tuzlanskog kantona”, a početak će se primjenjivati od 01.01.2017. godine.

B o s n a i H e r c e g o v i n a
-Federacija Bosne i Hercegovine-
TUZLANSKI KANTON
Skupština

Broj : _____/2016. godine
Tuzla, _____/ 2016. godine

Predsjednik
Skupština Tuzlanskog kantona,

Senad Alić, v.r.

OBRAZLOŽENJE NACRTA ZAKONA O ZNAČAJNIM DATUMIMA, DOGAĐAJIMA I LIČNOSTIMA NA PODRUČJU TUZLANSKOG KANTONA

USTAVNI OSNOV

Ustavni osnov za donošenje Zakona o značajnim datumima, događajima i ličnostima na području Tuzlanskog kantona sadržan je u članu 11. Ustava Tuzlanskog kantona (“Službene novine Tuzlansko-podrinjskog kantona”, br. 7/97 i 3/99 i “Službene novine Tuzlanskog kantona”, br. 13/99, 10/00, 14/02, 6/04 i 10/04) kojim je utvrđeno da je Tuzlanski kanton nadležan u svim oblastima koje Ustavom Federacije BiH nisu izričito povjerene federalnoj vlasti, i u članu 24. stav 1. tačka c) u kojem je utvrđeno da Skupština Kantona donosi zakone neophodne za izvršavanje nadležnosti Kantona.

RAZLOZI ZA DONOŠENJE ZAKONA

Razlog za donošenje predmetnog zakona sadržan je u činjenici da je potrebno sistemski urediti ovu oblast, sa ciljem stvaranja pretpostavki za trajno regulisanje obilježavanja značajnih datuma, događaja i ličnosti na području Tuzlanskog kantona.

Na osnovu zaključka Vlade Tuzlanskog kantona broj: 02/1-02-28362/15 od 14.12.2015. godine, zaduženo je Ministarstvo za boračka pitanja Tuzlanskog kantona, da pokrene aktivnosti u cilju izrade radne verzije Zakona o značajnim datumima, događajima i ličnostima na području Tuzlanskog kantona (u daljem tekstu Zakon).

U vezi navedenog Zaključka, Vlada Kantona je Rješenjem broj: 02/1-34-36756/15 od 14.12.2015. godine, imenovao Radnu grupu za izradu teksta nacrtu Zakona.

OBRAZLOŽENJE POJEDINIH ČLANOVA

Član 1. – Propisuje šta je predmet zakona, odnosno propisuje da se istim utvrđuju značajni datumi, događaji i ličnosti na području Tuzlanskog kantona, nosioci obilježavanja i nosioci aktivnosti obilježavanja kao i finansiranje.

Član 2. – Propisuje da je cilj ovog Zakona da se sačuva uspomena na značajne datume, događaje i ličnosti na području Tuzlanskog kantona

Član 3. – Propisuje definicije značajnih datuma, događaja i ličnosti, nosilaca obilježavanja i nosilaca aktivnosti.

Član 4. – utvrđuje koji su to značajni datumi, događaji i ličnosti od iznimne važnosti za Tuzlanski kanton.

1. Kao značajni datumi za područje Kantona utvrđeni su:

a) 11. januar, dan objedinjavanja Patriotske lige u Tojšićima (11.1.1992. godine, u Tojšićima održano je savjetovanja općinskih štabova Patriotske lige i komandira specijalnih jedinica);

b) 01. mart, dan nezavisnosti Bosne i Hercegovine, (29. i 1. marta 1992. godine, je održan referendum za nezavisnost BiH, i ovaj dan je odlukom Parlamenta BiH određen kao nacionalni paznik);

c) 15. april, dan Armije Republike Bosne i Hercegovine, (15. aprila 1992. godine, je službeno osnovana Armije Republike Bosne i Hercegovine);

d) 09. maj, dan pobjede nad fašizmom, i dan dobitnika najvećih ratnih priznanja (9.5.1945. godine, kapitulirala je nacistička Njemačka i ovaj datum se obilježava kao „Dan Europe“, a na incijativu predsjednika Predsjedništva BiH 1997. godine 9. Maj je ustanovljen kao dan dobitnika najvećeg ratnog priznanja „Zlatni ljiljan“);

e) 10. maj, dan 115. Brigade HVOa - Zrinski, (10.5.1992. godine osnovana je 115. Zrinjska brigada koja je egzistirala do 10.1.1994. godine)

f) 22. maj, dan policije Tuzlanskog kantona, i dan prijema BiH i UN (Skupština Tuzlanskog kantona je na sjednici održanoj 22. maja 1997. godine donijela Zakon o unutrašnjim poslovima Tuzlansko podrinjskog kantona , čime je uspostavljeno Ministarstvo unutrašnjih poslova Tuzlansko-podrinjskog kantona i taj dan se smatra kao dan osnivanja MUP TPK-a, a 22.5.1992. godine BiH je primljena u UN);

g) 12. juni, dan dobitnika najvećih ratnih priznanja i odlikovanja - obilježen dan bitke na Visu jer ta bitka predstavlja jedan od najznačajnijih događaja iz perioda odbrambenooslobodilačkog rata 1992.-1995. na području TK,

h) 22. avgust, dan formiranja Tuzlanskog kantona, (22.8.1994. godine, održana je konstituirajuća sjednica Skupštine Tuzlansko-podrinjskog kantona, i taj dan je konstituiran Tuzlansko-podrinjski katona koji je obuhvatao teritorij 17. općina);

i) 29. septembar, dan formiranja II Korpusa Armije Republike Bosne i Hercegovine, (29.9.1992. godine, osnovan je II Korpus Armije Republike BiH kao jedan od sedam korpusa u Armiji RBiH, a sjedište istog je bilo u Tuzli):

j) 25. novembar, dan državnosti Bosne i Hercegovine, (25.11.1945. godine, prvo zasijedanje ZAVNOBiH-a u Mrkonjić Gradu).

2. Kao značajni događaji na području Kantona utvrđeni su:

a) odbrana Sapne „Čekić i nakovanj“, 06.maj, (Ofanziva „Čekić i nakovanj“, trajala od 27.03.1995. godine do 13.05.1995. godine, s tim što je glavnina neprijateljskih snaga poražena 06.05.1995. godine).

b) oslobođenje Vijenca, 11. maj (na koti Vijenac izvojevana je pobjeda boraca Armije BiH koja je otvorila vrata Ozrena i omogućila nastavak oslobodilačkih operacija).

c) bitka na Brčanskoj malti, 15. maj (značaj bitke je što je zaustavljanjem Kolone JNA prilikom izlaska iz Tuzle, spriječeno iznošenje naoružja TO čime su se dijelom naoružale policijske snage)

d) stradanje Tuzlanske mladosti „KAPIJA“, čija godišnjica se obilježava 25. maja, (25.5.1995. godine na u Tuzli na „Kapiji“ je smrtno je stradao 71 građanin Tuzle a preko 150 ih je ranjena, a prosječna starost stradalih je oko 24 godine)

e) genocid nad Bošnjacima „sigurne zone“ UN-a Srebrenica, čija godišnjica se obilježava 11. jula (Genocid u Srebrenici je ratni zločin koji je izvršen u julu 1995. godine, i ovaj događaj se smatra kao jedan od najvećih masakara u Evropi od drugog svjetskog rata do danas).

f) odbrana Teočaka, 16. juli, (radi se o datumu koji objedinjuje obilježavanje borbi za deblokadu Teočaka, obilježavanje godišnjice 255. Slavne brdske brigade „Hajrudin Mešić“ te pobjede u ofanzivi pod nazivom „Seminar“).

g) akcija Oklopnog voza, čija godišnjica se obilježava 22. oktobra. (Spriječeno je zauzimanja grada Gradačca a samim tim, spriječen je i gubitak kompletne slobodne teritorije Brčkog, sem toga na čitavom prostoru BiH to je jedina i jedinstvena bitka u kojoj je upotrijebljen "oklopni voz".

3. Kao značajne ličnosti na području Kantona utvrđene su:

a) Mehdin Hodžića heroj odbrambeno-oslobodilačkog rata, 10. maja, (10.5.1992. godine, je dan pogibije imenovanog heroja odbrambeno-oslobodilačkog rata, koji je posthumno odlikovan ordenom Heroja oslobodilačkog rata i promoviran u čin Brigadnog generala Armije Republike BiH. Dobitnik je najvećeg ratnog priznanja Zlatni ljiljan).

b) Nesib Malkić heroj odbrambeno-oslobodilačkog rata, 25. septembar, (poginuo je na dužnosti komandanta 210. brdske brigade 25. septembra 1993. godine. Bio je nosilac ratnog priznanja Zlatni ljiljan od 1993. Posthumno je odlikovan Ordenom heroja oslobodilačkog rata 1994. godine).

c) Hajrudin Mešić heroj odbrambeno-oslobodilačkog rata, 30. Oktobar (poginuo je 30. oktobra 1992. godine u selu Nezuk. Dobitnik je ratnog priznanja Zlatni ljiljan i policijskog odlikovanja Medalja za hrabrost).

Član 5. – Propisuje ko su nosioci obilježavanja značajnih datuma, događaja i ličnosti, te je regulisan način obilježavanja i nosioci aktivnosti obilježavanja.

Član 6. – Propisano je da nosioci obilježavanja prilikom izrade budžetskog zahtjeva planiraju sredstva koja su neophodna za aktivnosti obilježavanja značajnih datuma, događaja i ličnosti. Takođe je propisano da nosioci obilježavanja donose godišnje programe kao i da planiraju i prate obilježavanje svih značajnih datuma, događaja i ličnosti utvrđenih ovim zakonom.

Član 7. – Propisuje da se sredstava neophodna za obilježavanje značajnih datuma, događaja i ličnosti obezbjeđuju u budžetu Kantona kao i iz drugih izvora.

Član 8. – Propisuje da jedinice lokalne samouprave mogu svojom odlukom utvrditi i druge značajne datume, događaje i ličnosti koji su od značaja za jedinicu lokalne samouprave te da Vlada Kantona može biti suorganizator obilježavanja značajnog datuma, događaja i ličnosti od značaja za jedinicu lokalne samouprave.

Član 9. – Propisuje prestanak važenja drugih propisa koji su regulisali ovu oblast.

Član 10. – Propisan je momenat stupanja na snagu predmetnog zakona i početka primjene istog.

Za provođenje ovog Zakona nisu potrebna dodatna finansijska sredstva za 2016. godinu, u Budžetu Tuzlanskog kantona.

PREDLAGAČ
VLADA TUZLANSKOG KANTONA